



15.10.2024

UKA2024/123

Matumuuna Inatsisartut maleruagassaanni § 33 malillugu isummerfigisassatut aalajangigassaq una siunnersuutigineqarpoq:

Pineqaatissinneqarsimasut tarnimikkut nappaatillit paaqutarineqartarnerat katsorsarneqartarnerallu pitsaanerpaaffissaminniitinniarlugit aningaasatigut, allaffissornikkut peqqinnissakkullu sulisunik nukissanillu qanoq qularnaarisinnaanitta misissorneqarnissaa siunertaralugu nassuiaasioqqullugit Naalakkersuisut peqquneqarnissaanik Inatsisartut aaljangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

(Inatsisartunut ilaasortaq Anna Wangenheim, Demokraatit)

Inatsisartuni ilaasortaq Anna Wangenheim, Demokraatineersup siunnersuutaanut pingaaruteqartumut imaattumik siumuminngaaniit oqaaseqassaaq.

Siunnersuuteqartumut qujanniarpugut siumuminngaaniit. Tassa kalaallit nunatsinni tarnimikkut innarluutillit amerliartortup siumuminngaaniit ilisimaarivarput. Tassa paasisutissat kingullit 100 missaaniittuusut ilisimatitsissutigineqarmata. Nunatsinnilu periarfissaluttuusut aamma ilisimaarivarput.

Tarnimikkut narparsimasuusut nunatsinni 90 %-ii angutaasuusut paasisutissutigineqarnikuuvoq. Amerlasuullu aamma imigassamik ikiarooratumillu ajornartorsiuteqartuullutik.

Tarnimikkut napparsimasut pineqaatissinneqarsimasut assigiinngitsutigut inissinneqartarput. Tassa A-mik eqqartuunneqarsimasut taakkuusarput inuttut nalinginnaasutut pineqaatissutaasartuni nalilersorneqarsinnaanngitsut.

b-milu eqqartuunneqarsimasut tassaagajupput inuttut ikiorserneqarsinnaallutik alloriaqqiffissaminnut tikkuunneqarsinnaasut. Tassaa A1-mi inissinneqarsinnaallutik piffissarlu qaangiukkaangat anisinneqaqqissinnaasut inuiaqatiginnillu akooqqilersinnaallutik.

A-milu eqqartuussat qallunaat nunaannut tassani tarnimikkut nappaatillit pineqaatissinneqarsimasut inissinneqarnissamik eqqartuussat unitsinneqartarput.

Tarnimikkut napparsimasut nappaatertik pillugu tarnimikkut nakorsaniit ilisimasaqartunik pilersaarusiorneqartarput alloriaqqinnissaannut tassa inuiaqatigiinnut akooqqilernissaannut qanoq iliortoqassanersoq. Siumuminngaaniit ilisimaarivarput pilersaarusiorneq pitsaasoq alloriarfigineqarsinnaalluuartuujuaannartooq. Kisiannili pilersaarusiornarneqarsimanngippat nappaatiminnik uteqqiasinnaanerat qanittuararsuujuaannartooq, sullissisunullu oqimaalutanngortarluni. Maanilu nunatsinni nakorsaqaarniarnikkut kiisalu aamma akulikitsunik paarlakaattunik nakorsaqaartarnitta kingunerisarpaa ilaanneeriarluni nakorsat piffissaalallutik pilersaarusiortarnerannik. Taamaasilluni suliat alloriarfiginatik uteqqiasusut isikkunittarlutik. Taamaammat siumut anguniartuarppaa sapinngisamik tarnip nakorsaanik ilisimasalinnik maani nunatsinni sivisuumik atorfeqartitsisinnaanissamik periarfissiornissaq. Kiisalu aamma tarnikkut nappaatilinnut sulisunik ataavartumik pikkorissartuarnissaq sulisut ilinniagaqanngikkaluit peqataaffigiuarnissaannik pilersaarusiortarnissaq.



Siunnersuuteqartoq inatsisartuni ilaasortaq Anna Wangenheim, Demokraatineersup siunnersuutaa paasisinnaalluarparput. Paasisutissammi oqarmata tarnikkut napparsimasut siunissami amerliartortussat, taamaammatt siumuminngaaniit siunnersuuteqartumut paasinnilluta naalakkersuisut allannguutissatut siunnersuutigisaat taperserlugu ataatsimiititaliamut susassaqartumut ingerlateqqipparput.

Mala Høy Kúko

Siumut